

Scuvrir il Grischun cun l'abunament general

■ **Cun l'abunament general grischun (BÜGA) via libra tras il Grischun, tgi n'enconuscha betg quai? L'abunament cumpiglia anc dapli. Las interpresas da transport en il chantun Grischun s'uneschan sut la marca BÜGA e vivan cuminaivlamain il traffic public en il Grischun.** Cun il sustegn da l'Uffizi d'energia e da traffic dal Grischun han innovaziun e buna colliaziun emprima prioritad. E dal reminent: Il BÜGA n'è betg mo valaivel sin la buna rait dal traffic public en il Grischun, mabain er suror quella. Cun il BÜGA viagiats Vos fin Ragaz Bogn, Bellinzona, Clavenna, Mals, durant ils dis da circulaziun dal bus express dal Bernina da Tirano a Lugano, da Tirano sur il Pass dal Stelvio a Müstair e da Spleia a Clavenna. Dapli infurmaziuns – en tut las trais linguas chantunalas – sut www.büga.ch.

Il BÜGA – els ed ellas al han

Ir cun l'auto da posta cun il BÜGA

«En 20 minutas scuntur jau mia amia Lädina a Casti. Dapi che jau hai il favurivel «BÜGA-Plus Familia», ans vesain nus bier pli spontanain. E noss temas da discussiun na van mai a fin, pertge che l'auto da posta – cun WiFi

gratuit – è il lieu ideal per m'infurmar davart quai che curra e passa tra nus ed ora en il mund. Instagram: check! Facebook: check! Watson News: check! Bored Panda: check! Oz en damaun hai jau fatg ina coola fotografia d'ina giagliana sin ina chaura. Quai dat in mega post en Facebook. Check! Uschia survegn il num «auto da posta» ina significaziun tut nova. Tscheccas ti?» (Nadine, 16, Tinzong).

Ir ad ina party cun il BÜGA

«En paucs muments arrivain nus a Segl. Party da grill tar Daniela e Sven. L'atmosfera è super – auter che l'ultima giada. Quella giada essan nus ids cun l'auto da Gian. Quai è bain stà vaira pratic. Mo tup che Gian – sco sulet – ha dastgà baver mo cola ed aua minerala. Insatgi auter n'ha el er betg vuli laschar manar sia nova «maschina». Cur ch'il stumi dad Andrea ha undrà, sin via a chasa, en atna moda, il stil da guidar sportiv da Gian, n'è la finala betg mo l'atmosfera stada giu per terra. Questa giada essan nus ans decidids per il traffic public. La party po uss cumenzar senza quitaids. E finida n'è ella anc ditg betg, pertge quai che l'ultim bus cursescha la fin d'emma pir tard suenter mesanotg.» (Mario, 22, Samedan).

Lavurar en il tren

«Savens vegn jau dumandada, pertge che jau n'abitia betg a Cuira, empè da pendular mintga di. Il motiv è simpel: Jau na vules renunziar ni a mia piazza ni a mes lieu d'origin. Per fortuna poss jau nizzegiar il temp en il tren per mia lavur. La firma ma paja schizunt il pretsch sup-



Impressiun da la Ruinaulta che collia la Val dal Rain da Cuira cun la Surselva.

FOTO: PD

plementar per il BÜGA da la 1. classa. Uschia poss jau savens ma concentrar meglier en il tren ch'en il travasch dal biro. E sche jau n'hai ina giada nagina quaida da lavurar, ser jau simplamain il notebook. Sche jau lasch lura sgular mes patratgs tras la cuntrada che passa sperasvi, è quai in pau sco en vacanzas. En tals muments sun jau bunamain in pau scuidusa... da mamezza.» (Elena, 35, Bravuogn).

Ir cun velo cun il BÜGA

«Mes amis pretendan che jau saja adina sut tensiun. Quai constat in pau, pertge che dapi che jau hai in velo da muntogna electric, in ma dumognan ins strusch pli giu da la sella. Durant dis sco oz pir da dretg betg. Jau di mo: Bernina – Puschlav (Alp Grüm)! Da Puntraschigna vai sur il Pass dal Bernina fin giu Puschlav. 570 meters d'atezza ensi e lura 1365 engiu. Ormons da ventira, vos dastgais uss vegnir! Avant che nus prendain a Poschiavo la Retica per turnar sin il Pass dal Bernina, datti natiralmain anc «pizza & gelato». Giu dal pass pudain nus filar pli tard rinforzads e recreads enavos a Puntraschigna, per lura turnar cumadaivlamain a chasa cun la viafier. Supereasy! E dapi che jau hai il BÜGA, è tut anc pli simpel: uss dovr jau in bigliet mo pli per mes velo. Gea, qua han dus chattà in l'auter, pertge che er la viafier è adina sut tensiun.» (Mario, 41, Claustra).

Viagiar cumadaivlamain cun il BÜGA

«Tgi ch'ha in auto, na po savens strusch s'imaginar ch'i dat in med da viagiar pli cumadaivel. Er tar mai è quai stà ditg uschia. Ma cur che jau sun vegnì envidà ina giada ad in viadi cun il Gourmino, hai jau chattà il gust en il vair senn dal pled. Dapi lura viagesch jau tant sco pussaivel cun la viafier u cun il bus. L'ir cun auto è sa midà entaifer 30 onns d'ina passiuon ad ina necessitad. Tant pli fitg giadud jau oz da pudair ma pusar enavos, leger insatge u giudair la cuntra-

da, sche jau sun en gir. In a sto gea betg adina esser in menu da 3 tratgas en il Gourmino. Gia in sandwich ed in café ma pon far ventiraivel, sche las muntognas grischunas passan sperasvi sco sin ina tailla gronda. L'auto avain nus bain anc, pervi da la famiglia, ma en il fratep na poss jau strusch pli m'imaginar da desister dal BÜGA.» (Pedro, 48, Cuira).

Cun il BÜGA en il Tessin

«En sasez vul BÜGA gea dir «abunament general grischun». Tant pli surprais essan nus stads d'udir ch'ins possia viagiar cun il BÜGA er en il Tessin. Quai n'avain nus betg ans laschads dir duas giadas. Oz giain nus a Bellinzona al Festival da blues e damaun pernottain nus là tar vegls amis ed ans sfunsain en l'atmosfera mediterranea. Quai era en sasez gia adina sin nossa glista da pendenzas, ma mintgatant dovre simplamain in stausch per daventar activ. En quest cas èsi senza dubi stà la super purschida dal BÜGA.» (Esther, 48, e Thomas, 51, Tusaun).

Per explorators

Visitai cun Voss BÜGA las attracziuns las pli bellas dal Grischun. Simplamain entrar e partir. Intgins tips per Vossas excursiuns cun il BÜGA chattais Vos qua:

Surselva

Claustra da Mustér: Profitai dal BÜGA per in viadi en Surselva. Gia al cumenzament dal viadi spetga la Ruinaulta sco emprima sensaziun cun sia crappa bizarra. Pli enavant sa chatta la claustra da Mustér cun dus edifizis interessants. Betg mo per istorichers d'art e per istorichers da la natira vali la paina da visitar la baselgia claustrala ed il museum da la claustra. As persvadai sez.

Vitg qualter: Wellness, natira, architettura – Val S. Pieder persvada cun ina vasta purschida. Admirai la natira sin la senda panoramica sur Frunt fin Zervreila u giudai in'aventura da wellness d'emprima classa en la Terma a Val S. Pieder.

Ruinaulta: La Ruinaulta è la chavorgia monumental da Rain tranter Glion e La Punt/Rehanau. Utschels rars, paradis-crap alvas e furnaziuns da grip bizarras As spetgan en il Grand Canyon da la Svizra ch'è accessibel mo a pe, cun velo, cun la viafier u cun bartga. Tip: Da la piattaforma panoramica «Il Spir» anora pudais Vos giudair ina vista da 180 grads sur la Ruinaulta.

Regiun da Cuira – Scanvetg – Partenz

Cuira: Quaida da magia muntagnarda u da vita pulsanta en citad? La citad la pli veglia da la Svizra porscha tuttas duas pussaivladads. Giassas pittorescas e muntognas cuvertas cun naiv, centers da cumpra moderns e natira intacta, restaurants trendics e museums inter-

essants. Cuira è simplamain: la citad da las Alps.

Arosa: Là, nua ch'ils sportists da naiv stattan a sulegl l'enviern, slamuzzan ils viandants la stad. Ch'i sajan partys u quietezza – qua vegnan ademplitds ils gjavischs da mintgin.

Landquart Fashion Outlet: Dapli che mo shopping: Flanaì tras l'Open Air Village en il stil da chalets, circumdà da la culisa pittoresca da las muntognas grischunas, e profitai da purschidas da marca per pretschs spezial.

Tavau: La citad la pli auta da l'Europa è enconuschenta per sia diversitad da purschidas da sport, da temp liber e da cultura. Giudai la vita pulsanta da citad u scuvri ina da las numerusas sendas da viandar.

Engiadina

Bogn Engiadina: Sortir e sfunsar: Il Bogn Engiadina cumpiglia ovg differentes pools. Sin passa 2000 meters quadrat relaxais Vos – en il Bogn Engiadina – en in batschigl paschaivel a l'intern, en bogns surfbrants chauds, en ina variaziun da grottas d'aua chauda e fraida u en il bognd'aua da sal.

Parc nazional svizzer: Il Parc nazional svizzer è vegnì fundà l'onn 1914. El n'è betg mo il parc nazional il pli vegl da las Alps – cun ina surfatscha da 170 kilometers quadrat è el er il territori natiral il pli grond da la Svizra. El è situà en l'Engiadina en il quadrangul Zernez – S-chanf – Pass dal Fuorn – Scuol.

San Murezzan: Eleganza, stil e classa: San Murezzan n'è betg simplamain in lieu da vacanzas. A San Murezzan han cumenzà l'onn 1864 las vacanzas d'enviern en las Alps. Restaurants excellents e hotels da renum internaziunal retschaivan oz giasts da tut il mund.

Grischun Central

Mund da scarsolar Preda – Bravuogn: Sin binaris da renum mundial al divertiment rasant sin schlusigl: quai porscha l'aventura da scarsola Preda/Darlux – Bravuogn. Cun la viafier vai fin a Preda, nua ch'il divertiment cun la scarsola en direziun da Bravuogn po cumenzar.

Museum da viafier: Er la stad poi dar dis da plievigia ed er durant tals dis sa paja d'avair cun sai il BÜGA. Pertge che a Bravuogn spetga il Museum da viafier Alva familias ed amaters da viafier ed As preschenta l'istorgia da la viafier en il Grischun. En il museum avais Vos tranter auter la pussaivladad da metter en moviment virtualmain – cun dretgas clavellas e cun dretgs manetschs – la locomotiva legendara «Crocodil», e da la guidar tras la Val d'Alva.

Viaduct da la Landwasser: Tgi n'enconuscha betg il viaduct da renum mundial sur la Val da la Landwasser a Filisur. Cun il BÜGA giudais Vos via libra sur il monument bain il pli spectacular da la Viafier retica. Er vali la paina da sortir dal tren a Filisur. Ina spassegiada tar il punct

panoramic impressiunant u ina marenada patgifica directamain sut il viaduct da la Landwasser As spetgan.

Parc Ela: En il cor dal Grischun sa chatta il pli grond parc natiral da la Svizra. Il Parc Ela carmala cun ina natira e cuntrada impressiunanta sco er cun in ritg patrimoni cultural che dat perditga dal commerzi e dal barat ch'han gi lieu durant millennis sur ils pass tranter il nord ed il sid.

Val d'Avras: Sin vias aventurusas cuntanschais Vos – cun l'auto da posta davent d'Andeer tras la Val Ferrera – la val autalpina d'Avras. La vischnanca è situada sin 1670 fin 2126 m s.m. ed ha var 180 abitantas ed abitants. Sin sendas da ziczac As muvais Vos en il territori da cunfin tranter l'Italia e la Svizra.

Vers sid

Lingia dal Pass dal Spleia: La lingia dal Pass dal Spleia maina dal vitg da Spleia tras la val taliana da San Giacomo fin a Chiavenna. Visitai il vitg da Spleia ch'ha – grazia a ses center bain mantegnì – survegnì il Premi Wakker.

San Bernardin: La lingia Cuira – Bellinzona As maina sin ina tura d'exploraziun istorica. Cumenzar cumenza ella a Cuira – la citad la pli veglia da la Svizra. Vinavant vai tras la Tumleatga – la val cun la pli gronda spessezza da chastels en l'Europa. A Ziràn vali la paina dad ir a guardar la baselgia da renum mundial da son Martin. Vinavant maina la lingia da l'auto da posta tras il tunnel dal San Bernardin e tras la Val Mesauc fin a Bellinzona. Bellinzona As beneventa cun in ambient mediterranean e cun trais chastels che tutgan tar il Patrimoni cultural mundial da la UNESCO.

Bellinzona: Bellinzona è enconuschent principalmain pervi da ses trais chastels Castelgrande, Montebello e Sasso Corbaro. Quest complex da defensiun dal temp medieval fa part dal Patrimoni cultural mundial da la UNESCO. La citad veglia e la baselgia Santa Maria delle Grazie è medemamain attracziuns da Bellinzona. Er il martgà emnil merita ina visita: Sonda en damaun chattan ins qua ils megliers products da la gastronomia tessinaisa.

Bus express dal Bernina: Il bus express dal Bernina As maina in moda confortabla tras la Vuclina pittoresca. Vos passais tranter auter speravi l'enconuschent Lai da Com. Bleras «stailas e stailletas» han qua lur residenzas da vacanzas. Il viadi cun il bus express dal Bernina va a fin a Lugano. L'atmosfera mediterranea da quest lieu envida da far bellavita.

Tirano: La citadina taliana da Tirano è citad da duana ed a medem temp il punct da partenza sid da la lingia dal Bernina. La baselgia da peleginadi Madonna di Tirano dat la tempra a la citad veglia romantica. Palazzi e gelati envidan da giudair l'italianità.

Val Puschlav: La Val Puschlav sa distingua tras ina cuntrada intacta cun bliers vitgs, en ils quals i vala la paina da sa fermar. Cun Voss BÜGA pudais Vos entrar e sortir dal tren sainza problems. En il vitg da Poschiavo giudais Vos ina pizza u in glatsch sin la piazza pittoresca ed alura ina spassegiada tras il quartier dals Spagnols «I Palazzi».

Alp Grüm: L'Alp Grüm cuntanschan ins mo a pe u cun la Viafier retica. Qua avais Vos ina vista spectaculara sur la Val Puschlav. As rinforzai sin la terrazza sulegliava dal restaurant Alp Grüm cun bizochels fatgs en chasa per Vossa tura per lung da la lingia da viafier, fin giu Cavaglia u fin sin l'ospizi dal Bernina, il tetg da la Viafier retica (2253 m s.m.).

La presentaziun:
Dossier «BÜGA».

Dapli infurmaziuns:
chatta.ch/?hiid=xx
www.chatta.ch



Il trajet da la Viafier retica tanscha fin a Tirano (I).

FOTO: MAURIZI MORO5153 / CC BY-SA 4.0